

Ultimo biaha Obra di teatro: Cambio di Horizonte



Cambio di horizonte lo ser presenta e ultimo biaha na Aruba despues di haci un gira exitosamente na Brazil, Francia, Hulanda y Korsow.

Cambio di Horizonte ta un obra moderno- contemporaneo di character multi disciplinario dirigi pa Amy Lasten, cu ta trata e tema complica di inmigracion. Ryan Oduber, un gran artista a sa di enrikece e obra aki como 'vormgever' cu su diseño di imagen, video, efecto di luz y e xenografia.

Migracion, un tema hopi conoci den nos comunidad E obra aki ta conta e historia di un famia cu tin cu emigra di un humilde cas pa otro pais, Aruba. Un pais diferente y completamente desconoci, na unda cada miembro di e famia aki, ta topa cu otro forma di manera di biba; ta wordo confronta cu e obstaculonnan y complicacionnan cu e cambio drastico aki ta

trece cune, specialmente sin preparacion y mas pio sin un status legal.

E mucha muhe Arubano ta haya su mes tin cu biba cu e famia di e casa y aunke e ta den su cas e ta sinti cu ta e tin cu adapta na suegra y e famia di e casa. E pregunta cardinal ta: ta ken tin cu adapta na

ken?

Cambio di Horizonte sin duda, ta un obra di taya internacional na unda ta ser refleha e temanan di adaptacion, integracion y aceptacion cu e cambio di un horizonte nobo ta exigi den cualkier tipo di situacion migrante.

E diferencianan cu nan ta haya den cada un di e situacionnan cu e famia aki tin cu pasa den pa causa di destino of pa mala fortuna, ta pone den peliger e unidad familiar y e conflictonan ta bira cada bes mas y mas grandi.

Ademas di tur esaki, ta muestra e bida y refleho di un mama dominante y ta destaca den escenanan intenso diferente forma di biba, exigencia, frustracion, recuerdo, trabou, lucha pa territorio, encuentro cu destino ta pone riba nan caminda.

E obra ta haci uzo di imagenan proyecta, video y grabacion y musica en bibo y esakinan ta duna un efecto hopi unico y espectacular na e obra. E obra aki skirbi pa e famoso director di teatro Hulandes Nicoline Nagtzaam ta describi e problem-

atica di migracion cu e gracia di hopi humor. E artistanan mas principal: Jhon Freddy Montoya, Marjorie Luidens y Madeleine Kelly ta demonstra nan gran talento. E rumannan entre otro Dario Medina, Joshua Maduro ta hunga un papel sumamente interesante y Gaudys como Lena ta hunga e papel di e muhe cu ta conquista un di e rumannan

riba un forma hopi rafina y erotico. Anaisa Orman, un hoben prometededor ta hunga e papel di su compañera cu ta jaloers riba dje.

E obra aki lo ser presenta diaranson dia 6 di mei pa 8'or na Cas di Cultura. Carchi lo ta obtenibel na van Dorp, Aruba Post na SN, Check Point Color y Cas di Cultura. □

